

tek ovdje, na ovoj divnoj olimpijskoj planini, vidi i osjeća kolika je odgovornost i obaveza Kalgarija da ni u čemu ne zaostane za Sarajevom.

Slične impresije, pa i strepnje, prate i sljedećeg domaćina XXIII ljetnih olimpijskih igara u Los Angelesu, gradonačelnika tog američkog velikog grada, Toma Bredlija.

Domaći, sarajevski reporteri, danas, uoči sutrašnjeg početka Igara, vrše posljednje „inspekcije grada”. Jednodušno konstatuju da grad svakom svojom porom već živi za veliki događaj. To je vidljivo na svakom koraku – čita se u današnjim reporterskim zapisima, koji, očigledno, ne mogu da izbjegnu ni odgovarajuću liričnost u svojim impresijama. Grad je umiven, odjenut u prazničko ruho. Raskošana, drevna Baščaršija valjda je ovih dana najviše sniman motiv na svijetu. Stotine, hiljade kamera tumara sokacima, zaviruje u kutove čepenaka i bilježi dio bogate prošlosti ovog grada.

Ne promiče stranim zapažanjima ni osmijeh domaćina na ulici, u prodavnici, u restoranu, na šalteru...

Grad dežura 24 sata dnevno – pišu reporteri danas – i ugostitelji, i trgovci, i taksisti, i, zlu ne trebalo, ljekari. Autobusi i tramvaji danonoćno kruže ulicama, desetine vozova i aviona slijevaju se u grad.

Dok se na olimpijska borilišta – bilježe isti hroničari ovog posljednjeg predolimpijskog dana – na snijegom prekrivenim planinama, smještaju takmičari, koji se zagrijavaju za veliki početak, grad u dolini odiše pravom proljetnom atmosferom.

Svi nekuda žure, a, opet, svuda vlada savršeni red: domaćini XIV ZOI besprijekorno izvršavaju svoje goleme i odgovorne zadatke.

U Sarajevo su stigle okrunjene glave, ali i hiljade običnih ljudi iz svih krajeva svijeta. Gradom odzvanjaju riječi na desetinama jezika...

Sve se čini da bilo čije dileme ne budu tmurna briga – da one budu samo prijatna neodlučnost: kojem atraktivnom događaju, programu i ponudi se prikloniti: da li se danas odazvati na raskošan prijem koji u salonima Skupštine priređuje ekstravagantna američka milijarderka Vanderbilt Vitni za goste i domaćine; da li krenuti na izložbu u Dom Armije posvećenu nobelovcu Ivi Andriću i njegovoj čuvenoj „Na Drini ćuprija”; da li se uputiti na koncert folklornog ansambla KUD „Slobodan Princip Seljo”; da li odgovoriti na poziv japanske firme „Micubiši” „Poziv na ples” u Disko-klubu na Dobrinji, gdje, uz ostalo, domaćin nudi besplatan prevoz i besplatno piće; da li krenuti prema Vogošći i tamošnjem Sportskom centru na novinarsko „Veče kuglanja”...

Ovaj grad sutra dočekuje Olimpijski plamen iz oba pravca i priprema mu spektakularni doček.

Igre mogu početi.